

Date – 31/03/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Chief Minister Pu Lalduhoma chuan Finance Commission 15-na ruahman angin VC-te pualin Mizoramin cheng vaibelchhe 362 a dawn kim thu a sawi.
2. Ram pum Chhiarpui chu ram chhung hmun dangte rualin naktuk atang hian Mizoramah tan a ni ve dawn.
3. MNF Legal Board hruaitute chuan Inthlan apianga hmeichhe candidate-ten mawi lo tak taka social media-a beih an tawk thin chu pawu an tih thu an sawi.
4. State Assembly inthlan neihna tur state-ah te, kum upa leh pianphunga rualbanlote, an chenna in-ah vote thlak tir tan an ni.

<><><>

RLB GRANTS

Chief Minister Pu Lalduhoma chuan Finance Commission 15-na ruahman angin VC-te pualin Mizoramin cheng vaibelchhe 362 a dawn kim thu a sawi.

Social media kaltlanga he thu hi tarlangin Chief Minister chuan Rural Local Body (RLB) Grants an tih mai hi sorkar hmasa hunah khan cheng vaibelchhe 34 leh nuai 50 chauh hmuh a nih thu a sawi a. Sorkar laipuiin Finance Commission sum dawng thei tura inkaihhraina a duan thar 'Audit-Online' tih zawh a nih phawt loh chuan tanpuina pawisa a pe chhuak thei ta lo a. He Audit-Online hi kalpui a nih loh avangin Mizoramin a dawn chhunzawm ta lo char char mai niin a sawi. Sorkar thar a lo pian hnu January 2024 atangin Directorate of Local Fund Audit & Pensions leh LAD lam ten hma nasa takin an la tih a sawi a. Audit-online te chu an bawhzui a. Kum 2021-2022 hnuaia RLB grants thawh hnihna chu Mizoramin a hmu chhunzawm leh thei ta niin a sawi a. Kumin thlengin a dawng chho ta char char a. Finance Commission 15-na hnuaia RLB tanpuina sum dawn tawp berna tur chu he Finance Commission hun chhung ngeiin, March ni 28 khan dawn a ni ta a ni, a ti a. He tih hian Mizoram chuan RLB Grants hi Finance Commission 15-na in a ruahman sak ang zawng zawng, a vaiin cheng vaibelchhe 362 a lo dawng thei ta a ni, a ti.

Pu Lalduhoma chuan heng sum chhawrtu Village Council zawng zawngte a lawmpui thu a sawi a. Sum dawn theih na'na chhun-zan zawma rim taka hnathawk

thin Directorate of Local Fund Audit & Pensions leh LAD Deptt te chungah lawmthu a sawi bawk a ni.



TURMERIC

MzSRLM hnuaiia din Ropuiliani Women Farmer Producer Company Limited (FPC) chuan a kuthnathawktute tharchhuah Kolasib leh Mamit District atanga a leisak Aieng Metric Ton 71 (KG 71,600) chu, vawiin khan District Mission Director/Project Director, DRDO Kolasib District Pu Lalmuanpuia chuan Kolasib DC Office Complex atangin a vailiam.

He aieng vailiamna hun hi Block Mission Director/Block Development Officer, BMMU, Thingdawl R.D Block Dr. Doris Lalrinawmi chuan a kaihuai a. Pu Lalmuanpuia chuan Mizoram State Rural Livelihoods Mission (MzSRLM) hnuaiia agri-marketing value chain atana din Ropuiliani Women FPC in Kolasib leh Mamit District huamchhunga a shareholders te hnen atanga a leisak Aieng MT 71 zet, SSB AGRO LLP, Mizoram hnena hralhchhuah a ni chu lawmawm a tih thu a sawi a ni. Ropuiliani Company chu kuthnathawktu Self Help Group (SHG) te tana inngahna tlak ni ngei tura Ministry of Rural Development-in a din a nih thu sawiin, MzSRLM chu he company bultantu an nih thu Pu Lalmuanpuia chuan a tarlang a. SHG te hi mi taima tan chuan chhungkaw eizawna nghahchhan nghet a nih theih thu leh, sawrkar flagship programme-ah pawh sawhthing, aieng leh hmarcha te hi kuthnathawktute tharchhuah zara ramin hma a sawn theihna tur atana tum ber a nih thu a sawi bawk. Hengte hi hlawhtling thei turin Ropuiliani company chuan ruahmanna mumal tak a nei a, a thawktute pawhin a puitlin nan theihtawp chhuah turin a chah a ni.

Ropuiliani Women Farmer Producer Company Limited hian tun dinhmunah District 7 leh R.D Block 16 huam tel tawhin, shareholders (SHG) mi 9,500 chuang an iniziaklut tawh a. An member-te hnen atang hian sawhthing leh Mizo hmarcha te lo leisak tawhin, tun dinhmunah Aieng leh sawhthing District dang atanga lei leh turin ruahmanna kalpui mek a ni. He company hian heng thlaite hi a hringa hralhchhuah piah lamah, Company Processing Unit, Chhingchhip-ah value addition kalpui mekin hmalak chhonzawm zel tum a ni.



WEATHER

Indian Metereological Dept. (IMD), Aizawl Director Pu Sudheer Kumar Dwivedi chuan hmarchhak lama chhum chhah tak satellite atanga an hmuh atangin leh radar leh ground network atanga thlirlawkna-ah Mizoram hmun thenkhatah zanin leh naktuk hian ruah tam tham tak a sur thei a, thli pawh darkar khata 30-40 a chak a tleh theih bakah tek tla a nasa thei bawk a ti.

Akashvani News zawhna chhangin IMD Aizawl Director chuan Mizoram district hrang hrang a bikin Mamit, Kolasib, Aizawl, Lunglei, Lawngtlai leh Khawzawl-ah thlipui leh ruah a tlak tam rin a ni a, mipuite chu an awmna hmun-ah fimkhur tur leh thli leh ruah laka chhe mai thei Inah awm lo turin a chah, tek in a den duh bikna thing hnuaiia awm lo turin leh thlirlawkna atangin leimin awm theihna hmun thenkhat a awm avangin mipuite fimkhur turin a chah a ni.



CENSUS 2027

Ram pum Chhiarpui chu ram chhung hmun dangte rualin naktuk atang hian Mizoramah tan a ni ve dawn.

Chhiarpui 2027 hi India ram pum Chhiarpui vawi 16-na a ni dawn a, India ramin zalenna a neih hnu a a vawi 8-na a ni thung dawn a. Chhiarpui lo awm tur hi thawh hniha kalpui a ni ang a. Naktuk atang hian Chhiarpui hna thawktute chuan mihring chhinchhiah hna ni lovin in ding lai leh a chhunga chengte dinhmun leh an bungraw neihte chhinchhiah hna (house listing) an tan ang a. Naktukah vek hian Chhiarpui atana mahni inziahlul leh inthun theihna self enumeration portal chu hawn a ni ang a. Online hmangin mahni inziahlul tan theih a ni ang. Thla thar ni 15 atanga May ni 14 inkar chhung khian ‘House Listing Block (HLB)’ an tih chu kalpui a ni ang a. Mahni leh mahni inziahlul piah lama mihring chhiarpui tak tak chu nakum lamah kalpui a ni dawn a ni. Tun tum Chhiarpui hi in tina luha mihring chhiar a ni dawn chungin lehkhapuan hmang lovin, a vawikhatna atan digital hmang veka kalpui a ni dawn a. Digital a kalpuina-ah hian mobile apps hman a ni dawn a ni.

Chhiarpui kalpui hun tur hnunung ber kum 2021 khan Covid-19 hri leng avangin kalpui a ni ta lova. Tun tum hi kum 2011 hnu a India ram Chhiarpui awm leh hmasa ber tur a ni dawn a ni.



Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



WOMEN-MNF

MNF Legal Board hruaitute chuan Inthlan dawn apianga hmeichhe candidate-ten mawi lo tak taka social media-a beih an tawk thin chu pawin an tih thu vawin khan an sawi.

MNF Legal Board hruaitute chuan hetiang thil hi hmeichhiate hmuhsitna-ah an ngai tih Aizawl Press Club-ah puangin hmeichhe candidate-te social media kal tlanga mawi lo tak taka beihna a lo chhuak thin chu hmeichhiate dinhmun rahbehnaah an ngai tih an sawi. MNF Legal Board Treasurer Pi Zothansangi Hmar chuan tun hnai-ah MNF ten AMC inthlanna lo awm tura Ward 4-na a MNF candidate Nl. R. Lalnunthari (Nunui Rualheng) chuan mawi lo tak tak, hmeichhiat mipatna rawngkai leh hmeichhiate zahawmna tibawrhbang thei zawnga beihna a tawk nasa hle tiin, hemi chungchang hi an ngai thutak hle tih a sawi a. He tiang hi a thleng leh a nih chuan a tul ang zelin MNF Legal Board chuan hma lak an tum tih a sawi bawk. State Election Commission-in inkaihhraina tha tak a siam chung pawhin mi thenkhatte chuan an duhthawh luatah tun hnai lawkah social media lamah an khingpuite mimal nun leh an nihna dik lo takin, mipuite rilru hruaikawi tur zawngin, thlak leh thu post an siam nasa hle a ni a ti.

Model Code of Conduct 2026 Bung II (c)-na khingpuite leh party hruaitute mimal nun, mipui rawngbawlna lam nena inkaihnhawih ni si lo, insawi chhiatna hi a khap tlat tih a sawi a. Inthlan a nih avanga candidate hmeichhiate zahawmna leh mawina tibawrhbang zawnga thu leh thlalak thehdarh te hi India ram criminal law hnuaia pawikhawihna a ni a, court thubuai neih theihna leh thiam loh chan phei chuan lungin tan emaw pawisa chawi theihna a ni tih a sawi a ni. Pi Zothansangi chuan ramin changkan lam a pan mek emaw tih laia inthlan apianga a hnufual zawng leh hnungtawlh zawnga in beihna awm thin chu India rama literacy rate sanna state tih atan hian a mawi lo takzet ni mai lovin tih loh tawp tur a ni, a ti.



PASSOVER

Mizo Juda awm thenkhat tiamin India rama Juda hnam awmte chuan naktuk atanga serh tan tur Kalhlen Kut an hmang ve dawn lo.

Ram chhunga rawn zin, West Asia indona avanga India khawpui thenkhata tangkhangte hnen atanga thu dawn danin Israel sipai, Israel Defense Forces (IDF)-te chuan a bik takin India leh Thailand a Juda mi awmte chu Kalhlen Kut hmang tura pungkhawm lo turin an hriattir a. Hei hi firfiak pawlte'n khawvel hmun thenkhata Judate Kalhlen Kut hmang lai beih an tum thu an dawn vang a nih thu an sawi. Israel rama an kir theih mai tak loh avanga India ram khawpui pakhata tangkhang Mizo Juda chhungkua chuan IDF thurawn angin Kalhlen Kut hi an hman dawn loh thu an sawi a. US leh Israel tangrual leh Iran indona avang hian firfiakte'n hmun hrang hranga Juda mi, Israel khua leh tuite beih an tum ni a report a awm vang niin an sawi a ni.

He tih lai hian Mizoram leh Manipur atanga Israel hnambo ni a inngai 'Bnei Menashe' an tih hote pawhin an tum ang hunah pem turin Israel ram an pan thei rih lo. Bnei Menashe mi Mizoram leh Manipur a cheng 300 ve ve chu Israel a pem thla tura thlan fel an ni tawh a. Hemi thlang tur hian Juda puithiam (rabbi) 9 leh Jewish Agency for Israel mite chu nikum December thla bulah khan ni 10 chamin Aizawl-ah an lokal a. Pem tura an thlan chhuahte hi February thla a Israel rama thlawk thla tura ruahman a nih laiin Prime Minister Narendra Modi-a'n Israel a tlawh avang khan an khawtlai a. West Asia a indona a chhuaah zui leh avang hian Ram Thianghlim an pan theih hun tur hi a hriat theih ta lo niin an sawi a ni.



ASSAM HOME VOTING BEGINS

State Assembly inthlan nei tur Assam-ah kum 85 chung lamte leh pianphunga rualbanlote, an chenna in-ah vote thlak tir tan a ni a. Election Commission of India sawi danin Assam-ah hian an chenna in chhunga vote thlak tir tura Returning Officer-ten an pawm, kum 85 chin chung lam 19,774 leh pianphunga rualbanlo 6,638 an awm a ni. In lama vote thlak tir hi assembly bial zawng zawng bakah Assembly inthlan neihna tur dang, Keralam leh Puducherry-ah te pawh kalpui mek a ni a, April ni 5-ah zo fel hman tura ruahman a ni.

Hetih lai hian Assam Assembly inthlan neih tura BJP manifesto tur, vawiin khan Guwahati-ah Union Minister Nirmala Sitharaman-in a tlangzarh a, tlangzarh

inkhawmah hian Union Minister Sarbananda Sonowal-a leh Chief Minister Himanta Biswa Sarma-te pawh an tel a ni.

An manifesto-ah hian sorkarna an chana an tihlawhtlin tur thil 31 an tarlang a, chung zingah chuan dan lova state chhunga pem lut hnawhchhuahna tur Dan kenkawh te, sorkar hna nuai 2 siam leh Pay Commission 8-na hmante, miretheite tan KG atanga PG thleng, a thlawna zirna pekte a tel a ni.

<><><>